

III. Quæ Naturâ constant, aut omnia aut certè quædam moveri. *Arist. 1. phys. T. II.*

DEFINITIONES.

I. Quod compositum est, tum scire nos existimamus, cum ex quibus sit, & quid sit cognoscimus. Talia sunt principia & causæ. *T. 65.*

II. Res Naturales sunt quæ Naturam habent. Natura autem est principium Motus & Quietis ejus, in quo est, seu cujus Natura est.

III. Rerum Naturâ constantium Principia ea sunt ex quibus primis constant vel orta sunt. Colligitur ex d. *Met. c. 1.* suntq; interna vel externa, de internis agitur in duobus hisce capitibus, de externis tertio.

IV. Ex alio aliud fieri (*generalissime accepto vocabulo*) dicimus vel ut simplex, ut cum homo dicitur fieri Musicus, corpus calidum, ovum pullus; vel ut compositum, ut cum homo non Musicus dicitur fieri Musicus, *T. 58.* vel non calidum dicitur fieri calidum, non planta dicitur fieri planta.